

形者也後尸解雷震尸遂不見

廣記僕僕先生不知何許人自云姓僕時人因號僕僕先生
寓光州黃土山卽三十餘年餌杏丹飲食如常人貨藥爲業
人皆不識之時王弁遇之而授弁以杏丹之訣先生卽時昇
雲天太守李休光聞之以爲不祥先生復降休光之府休光
曰若仙當往去而復來妖也先生曰麻姑茅君皆問道於我
子以爲妖何也休光叱左右執之卽時龍虎君見於前而先
生上昇煙雲四合雷電震動觀者奔走休光謝罪明皇詔立
宮觀至今存焉

侯觀三松蘇菴兩竹

道藏輯要

三洞羣仙錄

聖

讀集四

八〇九

高道傳道士侯楷字法光京兆人也魏正始中爲道士授天
文祕訣晨夕之奉久而愈勤卜居於寒谷行三奔術誦大洞
經及三皇內文効召之法其居有清泉環流三松偃覆洒然
幽寂是爲栖真之所遂號三松觀

郴江集蘇真君耽母年百餘歲無疾奄然而逝鄉人爲立封
木以禮歛葬是日郡東北隅牛脾山上有紫雲覆木瀰漫不
散又若有白馬一疋繫於林間遂聞山嶺上有號哭之聲皆
云蘇君歸持母服鄉人竟往卽之其草菴前哭泣之所基址
平坦有竹兩株無風自搖掃其地終年常淨三年之後無復
哭聲白馬亦不復見矣